

# Karakteriliisarnermi tulleriinnilersuineq allatullu naliliisarneq pillugit Namminersornerullutik Oqartussat nalunaarutaat

Ilisimatusarfik pillugu inatsisartut inatsisaanni nr. 19, 19. november 2007-imeersumi § 7, imm. 1, isumaginninnermi perorsaasussanik ilinniartitsineq pillugu inatsisartut peqqussutaanni nr. 2, 20. maj 1998-imeersumi § 19, inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit inatsisartut peqqussutaanni nr. 2, ulloq 31. maj 1999-imeersumi § 7, imm. 1, folkehøjskolit pillugit inatsisartut peqqussutaanni nr. 9, 21. maj 2002-meersumi § 1, imm. 2, ilageeqarneq pillugu inatsisartut peqqussutaanni nr. 15, 28. oktober 1993-imeersumi § 34 a, kingullermik inatsisartut peqqussutaatigut nr. 7, 30. oktober 1998-imeersukkut allanngortinneqartoq, imarsionermik ilinniartitaanerit pillugit inatsisartut peqqussutaanni nr. 7, 11. november 2000-imeersumi § 6, imm. 2, § 8, imm. 2, § 9, imm. 2, § 10, imm. 2, § 11, imm. 2, § 13, imm. 2, aamma Ilisimatusarfimmiit oqaaseqaasiuteqqitaq naapertorlugit aalajangersarneqarput:

## Kapitali 1

### *Tulleriinnilersuineq GGS*

§ 1. Ilinniagaqartut misilitsinnerni soraarummeernernilu, ilinniartitaanerit ataasiakkaat pillugit malittarisassat malillugit misilitsinnerni, soraarummeernerni imaluunniit naggataarutaasumik allagartartaarnerni, karakteriliisarnermi tulleriinnilersuineq Greenlandic Grading System (GGS) malillugu nalilersorneqassapput, taamaattorli takuuk kapitali 2:

A: Naammassisamut pitsaalluinnartumut.

B: Naammassisamut ajunngivissumut.

C: Naammassisamut ajunngitsumut.

D: Naammassisamut ajorpallaanngitsumut.

E: Naammassisamut naammattumut.

Fx: Naammassisamut naammaginangitsumut.

F: Naammassisamut pitsaanngitsumut.

*Imm. 2.* Karakteriliisarnermi tulleriinnilersuinerup tuluit oqaasiinut nutserneqarnerini nalunaarummut ilanngussaq 1-imi taaguutit atorneqassapput. Agguaqatigiissitsinermut naatsorsuisoqassappat nalunaarummut ilanngussaq 2-mi allamut nuussinermut tabeli atorneqassaaq.

*Imm. 3.* Karakteriliisarnermi tulleriinnilersuineq aammattaaq ukiumoortumut karakteriliinermi assigisaannilu piginnaassutsinik nalilersuinerni atorneqartassaaq.

§ 2. Karakteri A naammassisamut pitsaalluinnartumut karakteriliunneqartassaaq, atuartitsissummi anguniakkanik naammalluartumik naammassininnermik takutitsisumut, amigaateqanngitsumut

imaluunniit annikitsuinnarnik pingaaruteqanngitsumik amigaateqartumut.

§ 3. Karakteri B naammassisamut ajunngivissumut karakteriliunneqartassaaq, atuartitsissummi anguniakkanik annertuumik naammassinninnermik takutitsisumut, annikitsumik ikittuinnarnik pingaarutilinnik amigaateqartumut.

§ 4. Karakteri C naammassisamut pitsaasumut karakteriliunneqartassaaq, atuartitsissummi anguniakkanik naammassinninnermik takutitsisumut, arlalinnik amigaateqartumut.

§ 5. Karakteri D naammassisamut ajorpallaanngitsumut karakteriliunneqartassaaq, atuartitsissummi anguniakkanik annikinnerusumik naammassinninnermik takutitsisumut, amerlasuunik annertuunik amigaatilimmut.

§ 6. Karakteri E naammassisamut naammatsumut karakteriliunneqartassaaq, atuartitsissummi anguniakkanik minnerpaamik akuerineqarsinnaasumik naammassinninnermik takutitsisumut.

§ 7. Karakteri Fx naammassisamut naammaginangitsumut karakteriliunneqartassaaq, atuartitsissummut anguniakkanik akuerineqarsinnaasumik takutitsinngitsumut.

§ 8. Karakteri F naammassisamut akuerineqarsinnaanngilluinaartumut karakteriliunneqartassaaq.

## Kapitali 2

### *Allamik naliliineq*

§ 9. Naliliineq "Angusivoq/Angusinngilaq" ilinniarnernut ataasiakkaanut malittarisassani tamanna aalajangersarneqarsimappat atorineqarsinnaavoq.

§ 10. Naliliineq "Angusivoq/Angusinngilaq" pillugu nalunaarummi aalajangersagaq taamaaqataanik "Akuerineqarpoq/Akuerineqanngilaq" atorlugu naliliinermi atorineqarsinnaavoq.

## Kapitali 3

### *Karakterinik aalajangersaaneq*

§ 11. Misilitsinneq aallartinneqareersimappat misilitsinnermik naliliisoqassaaq, soraarsitaaneq imaluunniit napparsimaneq pissutigalugit misilitsinneq kipitinneqanngippat, napparsimasimanerlu pissutissaqartitsinngippat misilitseqqissinnaanermut.

§ 12. Ilinniartitaanernut ataasiakkaanut malittarisassat malillugit anguniakkanik qanoq annertutigisumik naammassisaqarnermik imaluunniit piginnaasaqarnermik naliliinermi ataatsimut naliliineq tunngavigalugu karakterimik aalajangiisoqassaaq.

§ 13. Atuartitsissummut pineqartumut imaluunniit atuartitsissutit arlallit ingerlaneranut atuartitsissummi anguniakkat tunngavigalugit naammassisanik imaluunniit piginnaasanik naliliisoqassaaq (atuartitsissummut karakteriliineq). Ilinniartitsinerup imarisaatut allaaserineqarsimasumi atuartitsissutit imaluunniit ingerlannerata siunertaa aallaavigalugu naammassisaqarneq imaluunniit piginnaasaqarneq nalilerneqassaaq. Karakterit aalajangersimasumik agguarneqarniarnissaat anguniarneqassanngilaq (piviusut tunngavigalugit karakteriliineq).

§ 14. Censori imaluunniit soraarummeersitsisoq peqataasimappat taanna karakteriliisuussaaq. Censori soraarummeersitsisorlu naliliinermi peqataatillugit karakteri taakku akornanni oqalligineqarneratigut aalajangerneqassaaq.

*Imm. 2.* Censorip aamma soraarummeersitsisup ataatsimut naliliinissaq isumaqatigiissutiginnigpassuk tamarmik immikkut karakteriliissapput. Misilitsinnermi karakteri tassaassaaq, karakterit taakku agguaqatigiissitsinerat karakteriliisarnermi tulleriinnilersuinnermi karakterimut qaffasinnerusumik

qaninnermut akunnaallisillugu, censori qaffasinnerpaamik karakteriliisimappat taamaassimanngippallu karakterimut appasinnermut qaninnermut.

*Imm. 3.* Naammassisaq imaluunniit piginnaasaq "Angusivoq"-mut imaluunniit "Angusinngilaq"-mut nalilerneqassanersoq isumaqatigiinngittoqarpat censorip naliliinera aalajangiisuussaaq.

**§ 15.** Nalilersuinnermi censorit amerlanerusut imaluunniit soraarummersitsisut amerlanerusut peqataasimappata tamarmik ataasiullutik § 14, imm. 1 malillugu censoritut soraarummeersitsisutullu piginnaasaqassapput. Censoriusuni aamma soraarummeersitsisuni tamani isumaqatigiinngittoqarsimappat nalilersuinnerit ataasiakkaat agguaqatigiissinnerat karakeriliisarnermi tulleriinnilersuinnermi karakterimut qaninnermut akunnaallisillugu naliliineq aalajangerneqassaaq. Agguaqatigiissitsineq karakterit marluk akornanniippat qaffasinnerusumut akunnaallisineqassaaq.

**§ 16.** Naammassisanut imaluunniit piginnaasanut assigiinngitsunut arlalinnik karakteriliinikkut karakteriliisoqarsimappat karakteri tassaassaaq karakterit arlallit agguaqatigiissinnerat karakteriliisarnermi tulleriinnilersuinnermi karakterimut qaninnermut akunnaallisillugu. Agguaqatigiissitsineq karakterit marluk akornanniippat qaffasinnerusumut akunnaallisineqassaaq. Ilinniartitaanernut ataasiakkaanut malittarisassani aalajangerneqarsimasinnaavoq, ataatsimoortumik karakterimik aalajangiisoqassatillugu, karakterit ilai assigiinngitsumik pingaartinneqarlutik naleqartinneqassasut.

#### Kapitali 4

##### *Angusinissamut piumasaqaat*

**§ 17.** Soraarummeernermi, misilitsinnermilu imaluunniit piginnaasamik naliliinnermi angusinissamut piumasaqaateqarpat piumasaqaat naammassineqassaaq ilinniagaqartoq minnerpaamik karakteri E-mik imaluunniit naliliinnermi "Angusivoq"-mik angusaqarpat.

*Imm. 2.* Karakterit arlallit ilaappata, imm. 1-imi piumasaqaatit naammassineqarsimassapput, agguaqatigiissitsinnermi angusaq minnerpaamik 2,0-iuppat. Agguaqatigiissitsinnermi minnerpaamik 2,0-imik angusaqarnissaaq piviusunngortinneqarsinnaanngilaq akunnaallisaanikkut. Misilitsinnerni tamani "angusivoq" anguneqarsimassaaq, misilitsinnerni il.il. "angusivoq/angusinngilaq" naliliinnermi atorineqartillugu. Aammattaaq ilinniakkat ataasiakkaat malittarisassaanni aalajangersarneqarsinnaavoq piumasaralugu, misilitsinnermi ataatsimi misilitsinnerniluunniit arlalilinni il.il. agguaqatigiissitsinnermut ilaasuni, minnerpaamik karakteri aalajangersimasoq anguneqarsimassasoq.

#### Kapitali 5

##### *Misilitsinnermi imaluunniit soraarummeernermi ataatsimut angusat*

**§ 18.** Karakterit sorliit misilitsinnermi imaluunniit soraarummeernermi angusani tamarmiusuni ilaatinneqassanersut ilinniartitaanernut ataasiakkaanut malittarisassani takuneqarsinnaapput.

#### Kapitali 6

##### *Misilitsinnermi imaluunniit soraarummeernermi agguaqatigiissitsineq*

**§ 19.** Ilinniakkat ataasiakkaat malittarisassaanni aalajangersarneqarsinnaavoq, karakterit ataasiakkaat misilitsinnermi soraarummeernermiluunniit tamarmiusumik angusaasunut ilaasut, assigiinngitsunik oqimaassuseqarlutik ilaatinneqassasut.

*Imm. 2.* Ilinniartitaanernut ataasiakkaanut malittarisassani aalajangersarneqarsimasinnaavoq agguaqatigiissitsineq immikkoortunut aalajangersimasunut karakterit agguaqatigiissinnerinut naatsorsorneqassasoq. Taamaattoqartillugu angusinissamut piumasaqaat, § 17 naapertorlugu, immikkoortunut tamanut naammasineqarsimassaaq. Immikkoortuni assigiinngitsuni karakterit assigiinngitsumik oqimaassuseqartinneqarpata, § 21, imm. 2-mi periuseq immikkoortunut tamanut atorineqassaaq.

**§ 20.** Misilitsinnermi imaluunniit soraarummeernermi angusaq tamarmiusoq agguaqatigiissitsinikkut ersersinneqartarpoq kisitsisit arfineq-marluk aallaavigalugit karakterilersueriaaseq tunuliaqutaralugu, tak. § 22. Agguaqatigiissitsinerup naatsorsornerani decimali ataaseq ilaatinneqassaaq.

Agguaqatigiissitsinerup naatsorsornerani atuartitsissutit "Angusivoq/Angusinngilaq" atorlugu naliliiffigineqartut ilaatinneqassanngillat.

**§ 21.** § 16 naapertorlugu angusinissamut piumasaqaammi karakterit arlallit peqataatinneqarpata, § 17 naapertorlugu karakterimik ataatsimoortumik aalajangiinnermi, aamma § 20 naapertorlugu agguaqatigiissitsinermik naatsorsuinnermi, ilinniartitaanernut ataasiakkaanut malittarisassani aalajangersarneqartutut assigiinngitsumik oqimaassuseqarlutik karakterit ilaatinneqassapput.

*Imm. 2.* Agguaqatigiissitsinerit pingaartinneqartut tassaapput karakterit ataasiakkaat katinneqarneri, karakterit qanoq oqimaassuseqartinneqarneri amerlisarlugit, pingaartinneqartut katinneqarneri agguarlugit.

## **Kapitali 7**

*Misilitsinnermi, soraarummeernermi naggataarnermilu uppersaati*

**§ 22.** Misilitsinnermi, soraarummeernermi naggataarnermilu uppersaati tulliinnilersuineq GGS malillugu karakteriliunneqartunut tamanut kisitsisit arfineq marluk aallaavigalugit tulliinnilersuisarnermi kisitsit karakterimut pineqartumut naapertuuttoq ilanngunneqartassaaq, ilanngussaq 2 naapertorlugu.

*Imm. 2.* Soraarummeernermi agguaqatigiissitsinermi angusaasup kisitsisit arfineq-marluk atorlugit karakterilersueriaatsimi nalinga naatsorsorneqassaaq soraarummeernernullu uppersaammi ersilluni.

## **Kapitali 8**

*Immikkut akuersineq aamma saneqqussisinnaaneq*

**§ 23.** Immikkut ittumik pisoqarneranik tunngavissaqartillugu, assersuutigalugu ilinniartup ilinniarnerninik naammasinninnissaata ilinniakkamulluunniit akuerisaanissaata tamanna pisariaqalersippagu, Ilinniartitaanermut Naalakkersuisoqarfik nalunaarutit sanioqqunneqarnissaa pillugu immikkut akuersisinnaavoq.

*Imm. 2.* Misiliinnermut aamma ineriartortitsilluni suliaqarnermut atatillugu nalunaarummi malittarisassanik sanioqqutsisinnaaneq Ilinniartitaanermut Naalakkersuisoqarfimmit akuerineqarsinnaavoq.

## **Kapitali 9**

*Atuutilersitsinnermi ikaarsaariarnermilu aalajangersakkat*

**§ 24.** Nalunaarut aggstip aallaqqaataani 2008-mi atuutilerpoq piffissallu taassuma kingorna karakterinut naliliinernullu sunniuteqassalluni.

*Imm. 2.* Ilutigisaanik Karakteriliisarnermi naleqassutsinik tulliinnilersuineq allatullu naliliisarneq pillugit Namminersornerullutik Oqartussat nalunaarutaat nr. 14, 9. april 2001-imeersoq atorunnaarsinneqarpoq.

§ 25. Ilinniartitaanernut § 24, imm. 1 oqaaseqatigiinnut siullernut ilaatinneqartunut § 24, imm. 2-mi taaneqartoq nalunaarut aamma atuutissaaq, napparsimasimalluni imaluunniit misilitseqqinnernut aggstip aallaqqaataa 2008 sioqqullugu ingerlanneqarsimasussaagaluartunut.

§ 26. Misilitsinnermi, soraarummeernermi imaluunniit naggataarnermut uppersaammi karakterit tulleriinnilersueriaaseq 13 atorlugu karakteriliunneqarsimasut GGS malillugu tulleriinnilersueriaatsimut allangortinneqassapput, taamaattorli § 25 naapertorlugu. Karakterinut allamut nuunneqarsimasunut § 24, imm. 2-mi taaneqartoq nalunaarut malillugu karakteriliunneqarsimasut (tulleriinnilersueriaaseq 13 atorlugu karakteriliunneqarsimasut) aamma uppersaammit takuneqarsinnaassapput.

Imm. 2. Allamut nuussineq tulleriinnilersuineq manna malillugu ingerlanneqassaaq:

13 atorl. tulle-	13	11	10	9	8	7	6	5	03	00
riinnilersuineq										
Tulleriinniler-	A	A	B	C	C	D	E	Fx	Fx	F
suineq GGS										

Imm. 3. Ilinniartitaanernut ataasiakkaanut malittarisassat malillugit agguaqatigiissitsineq naatsorsorneqassappat tamanna GGS tunngavigalugu tulleriinnilersueriaaseq kisiat tunngavigalugu agguaqatigiissitsineq ingerlanneqassaaq, taamaattorli § 25 naapertorlugu.

Namminersornerullutik Oqartussat ulloq 23. juni 2008

Tommy Marø

/

Lise Lennert Olsen

## Ilanngussaq 1

### Karakteriliinermit tulleriinnilersuinerup tuluttuumut nutserneri

A: For an excellent performance displaying a high level of command of all aspects of the relevant material, with no or only a few minor weaknesses.

B: For a very good performance displaying a high level of command of most aspects of the relevant material, with only minor weaknesses.

C: For a good performance displaying good command of the relevant material but also some weaknesses.

D: For a fair performance displaying some command of the relevant material but also some major weaknesses.

E: For a performance meeting only the minimum requirements for acceptance.

Fx: For a performance which does not meet the minimum requirements for acceptance.

F: For a performance which is unacceptable in all respects.

## **Ilanngussaq 2**

Tulleriinnilersuineq ECTS aammalu kisitsisit arfineq marluk tunngavigalugit tulleriinnilersuinerup akornanni naleqqiussinerit

Tulleriinnersuinermi GGS-imi karakterip A-p kisitsisit arfineq marluk tunngavigalugit tulleriinnilersuinermi 12 assigaa

Tulleriinnersuinermi GGS-imi karakterip B-p kisitsisit arfineq marluk tunngavigalugit tulleriinnilersuinermi 10 assigaa

Tulleriinnersuinermi GGS-imi karakterip C-p kisitsisit arfineq marluk tunngavigalugit tulleriinnilersuinermi 7 assigaa

Tulleriinnersuinermi GGS-imi karakterip D-p kisitsisit arfineq marluk tunngavigalugit tulleriinnilersuinermi 4 assigaa

Tulleriinnersuinermi GGS-imi karakterip E-p kisitsisit arfineq marluk tunngavigalugit tulleriinnilersuinermi 02 assigaa

Tulleriinnersuinermi GGS-imi karakterip Fx-p kisitsisit arfineq marluk tunngavigalugit tulleriinnilersuinermi 00 assigaa

Tulleriinnersuinermi GGS-imi karakterip F-p kisitsisit arfineq marluk tunngavigalugit tulleriinnilersuinermi -3 assigaa

## **Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

[Linkit iluaqutaasussat](#)

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut